



Kikkut kalaaliunersut – kalaallisut kinaassuseqarneq qanoq paasineqartarnersoq pillugit apeqquteqaat aallaavigalugu oqallisissiatut siunnersuut
(Naleqqap Inatsisartuni ilaasortaaitai)

Uanga inuutillunga tikkuartuinngisaannartussaavunga kina kalaaliunersuq kalaaliunnginnorsorluunniit.

Kalaaliuneq isumanni nammineq qamani misigissutsitsinneersuuvoq. Nunarput ima isorartutigaaq kalaaliugualunga savaatillit silarsuaat, naatsiiveqarnerlu uannut takornartaapput. Kisianni savaatillit naatsiiviutillillu aamma kalaaliupput.

Aamma kalaaleqarpoq neqitorneq ajortunik, kalaaliminertorusunneq ajortunik, kalaallisulluunniit oqaluttuunngittunik.

Kalaaleqateqarpuguttaaq nunatsinniunngittunik, taakkualu kalaaliusutut misigippata nunami allami najugaqarnerat pissutigalugu oqarfigisinnaangilagut kalaaliunngittut.

Uanga kalaaliuvunga, kalaaliuneralu tulluusimaarutigaa. Kalaallisut oqaaseqarnera tulluusimaarutigaa, oqaatikkalu tassaapput toqqissisimallunga oqariartuutinnik apuussinissannut atortakkakka.

Kisianni aamma kalaaleqarpoq qallunaatuinnaq oqaluttunik, imaluunniit kalaallisut oqalussinnaagaluarlutik qallunaatut oqalukkusunnerusunik. Taakku aamma maani nunami inissaqarput, kalaaliusutullu misigissuseqarnerat ataqqinartuusoq isumaqarpunga.

Oqaluttuarisaanerput qiviarutsigu annertuumik qallunaat nunaannut attuumassuteqartuuvugut, ilaqutariippassuaqarpoq aappaa qallunaaq aappaa kalaaleq. Taakkualu kinguaaqartiterput, inuunerminnik ilusilersuisimasunik, kalaaliunerminnillu misigisunik pingaartitsisunillu.

Aamma qallunaaqarpoq kalaaliusutut misigisunik. Allaammi kalaallisuissuaq oqaaseqartunik, kisianni aamma kalaallisut oqaaseqanngikkaluarlutik kalaallisut imminut taasunik. Allaat piniartariaasitsinnik nerisatsinnillu uatsitorpiaq atuisunik.

Annerisaqaara kalaaliuneq pillugu oqaatsinut sangutinneqaraangat. Kalaaliugaanni kalaallisut oqaluttariaqarnermik nipilimmik oqalunneq. Tamanna annertuumik avissaartuutsitsinermik pilersitsisartooq isumaqarpunga. Oqaatsigut toqqissisimaffigalugit atugaraagut, oqaatsigut kinaassuserigatsigit.

Taamaattumik isumaqarpunga oqartoqarsinnaangittoq inuk qanoq ittoq kalaaliunersuq. Nunatsinnimi isorartuumi najugaqarnitsinni pingaartitagut kulturigullu assigiinngillat, kalaaliussuserput ilusilersorsimavarput najugarput naleqqussarfigalugu.



Kalaaliuneq annertuumik misigissusermiippoq. Misigissuseq kusanartoq, tulluusimaarutigalugu attatassaq. Ataatsimoornermik misigisaqartitsisoq, nuannaarnermik tulluusimaarnermillu misigiffiusoq, kalaallit allat ingerlalluarpata nuannaarutiginnittoq.

Isumaqarpugutaaq, kalaallisut kinaassuseqarneq politikikkut nassuiarniarsarissanngikkipput. Kinaassuseq, inummiit aallartittariaqarpoq. Kinaassuseq pillugu politikkerit annerusumik minnerusumilluunniit isumaqaraluarpata taakkunanga ilusilersorneqassanngilaq.

Akerlianik kalaaliunerput aammalu kalaallisut ataatsimoorfeqarnerput tulluusimaarutigissavarput.

Tassalu Demokraatit oqallinnermut tassunga oqaaseqaatigerusutaat.